

文献通考

二百十三之二百十八

庚五



漢書門			
一〇〇册	一〇八架	一五六八函	一五六八號類

內閣文庫	
元孝函	二五
一〇	一五六八
一〇	〇
一〇	〇

內閣文庫	
番號	漢 11568
冊數	100 (65)
函號	294 1



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak





文獻通考卷之二百十三

淺草文庫

宋鄴陽馬端臨 貴與 著

明蘄陽馮天馭 應房 校刊

經籍考子 雜家

漢藝文志雜家者流蓋出於議官兼儒墨合名法知國體之有此見王治之無不貫此其所長也及濫者為之則漫羨而無所歸心

漢志二十家四百三篇

隋志九十七部合二千七百二十卷

唐志六十四家七十五部一千一百三卷失姓名六家世南以下不著錄三十四

家八百六卷

宋三朝志七十部七百三十三卷

宋兩朝志十二部七十卷

經籍子

文獻通考卷之二百十三

萬曆四年重刊

乃用范蠡計然遂報強吳孟康注曰姓計名然越臣也蔡
謨曰計然者范蠡所著書篇名耳非人也謂之計然者所
計而然也群書所稱句踐之賢佐種蠡爲首豈復聞有姓
計名然者乎若有此人越但用半策便以致霸是功重於
范蠡而書籍不見其名史遷不述其傳乎顏師古曰蔡說
謬矣古今人表計然列在第四等一名計研班固賓戲研
桑心計於無垠卽謂此耳計然者濮上人也嘗南游越范
蠡卑身事之其書則有萬物錄事見皇覽及晉中經簿又
吳越春秋及越絕書并作計倪此則倪研及然聲皆相近
實一人耳何云書籍不見哉予按唐貞元中馬總意林一
書抄類諸子百餘家有范子十二卷云計然者葵丘濮上
人姓辛字文子其先晉國之公子也爲人有內無外狀貌
似不及人少而明學陰陽見微知著其志沈沈不肯自顯

計然王計然曰越王爲人鳥喙不可與同利也據此則計
然姓名出處皓然可見裴駟註史記亦知引范子凡史蕭
大圜云劉侯追蹤於松子陶朱成術於辛文正用此事曹
子建表引文子李善註以爲計然師古蓋未能盡也而文
子十二卷李暹註其序以謂范子所稱計然但其書一切
以老子爲宗略無與范蠡謀議之事意林所編文子正與
此同所謂范子乃別是一書亦十二卷爲總只載其序計
然及它三事云魯五陰陽數故不取則與文子不同
李暹之說誤也唐藝文志范子計然十五卷註云范蠡問
計然答列於農家其是矣而今不存

呂氏春秋二十卷

晁氏曰秦呂不韋撰後漢高誘註按史記不韋撰云不韋

相秦致辨士厚過之使人人著所聞集論以爲八覽六論
十二記二十餘萬言以爲滿天也萬物古今之事號曰呂
氏春秋暴之咸陽市門懸千金其上有能增損一字者予
之時人無增損者高誘以爲非不能也其勢耳昔張侯
論爲世所貴崔浩五經注學者尚之二人之勢猶能使其
書傳如此况不韋權位之盛學者安敢輕其意而有所更
易乎誘之言是也然十二紀者本周公書後儒竄於禮記
善矣而目之爲呂令者誤也

高氏子略曰淮南王尚志謀募奇士盧館一開天下雋絕
馳騁之流無不雷奮雲集蓬議橫起瓌詭作新可謂一時
傑出之作矣及觀呂氏春秋則淮南王書殆出於此者乎
不韋相秦蓋始皇之初也始皇不好士不韋則徠英茂聚
俊豪簪履充庭至以卜計始皇甚惡書也不韋乃極簡冊

功筆墨未精錄異成一家言吁不韋何爲若此者也不亦
異乎春秋之言曰十里之間耳不能聞唯墻之外目不能
見三畝之間心不能知而欲東至開悟南撫多鷄西服壽
靡北懷靡耳何以得哉剛帥此所以譏始皇也始皇顧不
察哉不韋以此書暴之咸陽門曰有能損益一字者予千
金卒無一敢易者是亦愚黔之甚矣秦之士其幾若此可
不哀哉雖然是不特人可愚也雖始皇亦爲之愚矣異時
亡秦者又皆屠沽負販無一知書之人嗚呼
陳氏曰十二記者即今禮記之月令也

淮南子二十一卷

晁氏曰漢劉安撰淮南厲王長子也襲封招致諸儒方士
講論道德總統仁義著內書二十一篇號曰鴻烈鴻大也
烈明也以爲大明道之言也避父諱以長爲脩後漢許慎

注慎自名注日記上今存原道假真天文地形時則覽宜精神本經三術繆譚齊俗道應記論詮言丘略說山說林等十七篇李氏書目亦云第七第十九亡崇文目則云存者十八篇蓋李氏亡二篇崇文亡三篇家本又少其一俟求善本是正之

容齋洪氏隨筆曰淮南王安招致賓客方術之士作為內書二十一篇外書甚衆又有中篇八卷言神仙黃白之術漢書藝文志淮南二十一篇淮南外三十三篇列於雜家今所存者二十一卷蓋內篇也壽春有八公山正安所延致客之處傳記不見姓名而高誘序以為蘇飛李尚左吳田申雷被毛被伍被晉昌等八人然惟左吳雷被伍被見於史雷被者蓋為安所斥而亡之長安上書者疑不得為賓客之賢者也

子略曰少愛讀楚辭淮南小山篇聳峻瓌瑋他人制作不可企攀者又慕其離騷有傳竊罷多思致每曰淮南天下奇才也又讀其書二十篇篇中文章無所不有如與莊列呂氏春秋韓非子諸篇相經緯表裏何其意之雜出文之沿複也淮南之奇出於離騷淮南之放得於莊列淮南之議論錯於不韋之流其精好者又如玉杯繁露之書是又非獨出於淮南所謂蘇飛李尚左吳田申雷被毛被伍被大山小山諸人各以才智辨謀出奇馳騫所以其書駁然不一雖然淮南一時所延蓋又非止蘇飛之流也當是時孝武皇帝雋銳好書蓋又有甚於淮南內篇一陳與帝心合內少君下王母聘方士搜蓬萊神仙譎怪日日備新其有感於淮南所謂崑崙增城瑤室懸圃弱水沅沙者乎武雖不仙猶享多壽三可為者卒不克終士之誤人一

至於此然其文字殊多新特士之厭常玩俗者往往愛其書况其推測物理探索陰陽大有卓然出人意表者惟楊雄氏曰淮南說之用不如太史公之用太史公之用聖人將有取焉淮南鮮取焉耳悲夫

周氏涉筆曰淮南子多本文子因而出入儒墨名法諸家雖章分事彙欲成其篇而本末愈不相應且并其事自相然錯如云武王伐紂載尸而行海內未定故不為三年之喪又云天下未定海內未輯武王欲昭文王之令德使夷狄各以其賄來貢遼遠未能至故治三年之喪殯兩極以俟遠方當諸子放言之時不啻口相考幾無一可信者又謂武王用太公之計為三年喪以不審人類嗜又甚矣

陳氏曰按唐志又有高誘法本本記題許慎注而詳序文節是高誘不可曉也序言自誣更少從同縣盧君受其自

其出處略可見
啓司官據東郡濮陽令十七年遷監河東則誘乃漢末人

子華子十卷

晁氏曰其傳曰子華子程氏各本晉人也劉向校定其書按莊子稱子華子見韓昭侯陸德明以為魏人既不合又藝文志不錄子華子書觀其文辭近世依托為之者也其書有子華子為趙簡子不悅又有秦襄公方啓西戎子華子觀政於秦夫秦襄之卒在春秋前而趙簡子與孔子同時相去幾二百年其抵牾類如此且多用字說謬誤淺陋殆元豐以後舉子所為耳

朱子曰會稽官書版本有子華子者云是程本字子華者所作孔子所與傾蓋而語者好奇之士多喜稱之以予觀

之其詞故爲艱澁而理實淺近其體務爲高古而氣實輕
浮其理多取佛老醫卜之言其語多用左傳班史中字其
粉飾塗澤俯仰態度但如近年後生巧於模擬變撰者所
爲不惟夾非先秦古書亦非百十年前文字也原其所以
祇因家語等書有孔子與程子傾蓋而語一事而不見其
所語者爲何說故好事者妄意此人旣爲先聖所予必是
當時賢者可以假托聲勢眩惑世人遂僞造此書以傳合
之正如麻衣道者本無言語祇因小說有陳希夷問錢若
水骨法一事遂爲南康軍戴師愈者僞造正易心法之書
以托之也麻衣易子亦嘗辨之矣然戴生朴陋予嘗識之
其書鄙俚不足惑人此子華子者計必一能文之士所作
其言精麗過麻衣易遠甚如論河圖之二與四抱九而上
躋六與八蹈一而下沈五居其中據三持七巧亦甚矣

其巧甚所以知其非古書也又以洛書爲河圖亦仍劉敞
之謬尤足以見其爲近世之作或云王鍾性之嫌寬令威
多作贗書二人皆居越恐出其手然又恐非其所能及如
子華子者今亦未暇詳論其言之得失但觀其書數篇與
前後三序皆一手文字其前一篇托爲劉向而殊不類向
宅書後二篇乃無名氏歲月而皆托爲之號類若世之匿
名書者至其首篇風輪水樞之云正是並緣釋氏之說其
卒章宗君三祥蒲壁等事皆剽剝他書傳會爲說其自序
出處又與孔叢子載子順事略相似孔叢亦
僞書也又言有大造
于趙宗者卽指程嬰而言以左傳考之趙朔旣死其家內
亂朔之諸弟或放或死而朔之妻乃晉君之女故武從其
母畜於公宮安得所謂太夫屠岸賈者與兵以滅趙氏而
嬰與杵臼以死衛之云哉且其曰有大造者又有呂相絕

秦語其不足信明甚而近歲以來老成該洽之士亦或信之固已可怪至引其說以自證其姓氏之所從出則又誣其祖矣大抵學不知本而眩於多愛又每務欲出於衆人

之所不知者以為博是以其弊必至於此可不戒哉周氏涉筆曰子華子所著劉向序者文字淺陋不類向其云善持論聚徒著書更題其書皆非當時事辭大抵十卷者編輯見意鳩聚衆語老莊荀孟國語素問韓非楚詞俱被剽拾殆似百家衣葆其實近時文字又多僻字義蓋古文屢降至漢世今文猶未專行吾嘗疑其三經後此書方出故信字說而主老莊又論治古之時積美于躬弗憂於無聞如擊考鼓鍾其傳以四達驛如也今則不然荒蕪怒號而獨秀者先隕霜露霄零而朱草交稿燻市之徒又從而媒孽以髡搖之萌意於方寸未有毫分也而觸機奔展

布其四體未有以為容也而得拳拮抱其一槩之操泯泯默默而願有以試也而漫漫之長夜特未旦也疾雷破山澍雨如注鷄鳴於壑而失其所以為司晨也人壽幾何而期有以待也吾反覆其言而悲之嗟夫斯人也是書也母乃黨禁不開善類塗地無所叫號之時乎

陳氏曰考前世史志及諸家書目並無此書蓋假托也館閣書目辨之當矣家語有孔子遇程子傾蓋事而莊子亦載子華子見昭僖侯一則此其姓字之所從出昭僖與孔子不同時然莊子固寓言而家語亦未可考信班固古今人表亦無之使果有其人遇合於夫子班固豈應見遺也其文不古然亦有可觀者當出近世能言之流為此以玩世耳

風俗通義十卷

晁氏曰漢應劭撰劭字仲遠奉之子篤學博覽多聞靈帝時舉孝廉仕至泰山太守撰風俗通以辨物名號釋時嫌疑文雖不典世服其入聞自序云風者天氣有寒暖地形有陰陽泉水有美惡草木有剛柔俗者含血之類象而生之千里不同風百里不同俗

陳氏曰唐志二十卷今惟存十卷餘略見庾仲容子鈔

文獻通考卷之二百十四

宋鄱陽 馬 端臨 貴與 著

明蘄陽 馮 天馭 貴與 較刊

經籍考 子 雜家

論衡三十卷

晁氏曰後漢王克仲任撰克好論說始如說異終有實理以侂儒守文多失其真乃閉門潛思戶牖牆壁各置刀筆著論衡八十五篇釋物類同異正時俗嫌疑後蔡邕得之秘玩以爲談助云世謂漢文章温厚爾雅及其東也已衰觀此書與潛夫論風俗通義之類比西京諸書驟不及遠甚乃知世人之言不誣

高氏子略曰書八十五篇二十餘萬言其爲言皆叙天證敷人事析物類道古今大略如仲舒玉杯繁露而其文詳

詳則禮義莫能覈而精辭莫能肅而括幾於蕪且雜矣漢承滅學之後文景武宣以來所以崇厲表章者非一日之力矣故學者向風承意日趨於大雅多聞之習凡所撰錄日益而歲有加至後漢盛矣往往規度如一律體裁如一家是足以雋美於一時而不足以準的於來世何則事之鮮純言之少擇也劉向新序說苑奇矣亦復少探索之功闕詮定之密其叙事有與史背者不一二書尚爾兄他書平袁崧後漢書云克作論衡中土未有傳者蔡邕入吳始見之以爲談助談助之言可以了此書矣容有難克書煩重者曰石多玉寡寡者爲珍龍少魚衆少者爲神乎克曰文衆可以勝寡矣人無一引吾百篇人無一字吾萬言爲可貴矣予所謂乏精覈而少肅括者正此謂歟

陳氏曰克肅宗時人仕爲州從事治中初作此書北方初未有得之者王朗嘗詣蔡伯喈搜求至隱處果得論衡捉取數卷將去伯喈曰惟我與爾共勿廣也然自今觀之亦未爲奇

仲長子昌言二卷

崇文總目晉傳漢仲長統撰按本傳統論說古今及時俗行事著論多昌言凡三十四篇十餘萬言隋唐書目十卷今所存十五篇分爲三卷餘皆亡

傳子五卷

崇文總目晉傳休鑾撰集經史治國之說評斷得失各爲區例本傳載內外中篇凡四篇亡錄合一百四十篇今亡一百一十七

公侯政術十卷

崇文總目魯人初撰蓋魯人名初不著其姓未詳何代人

正訓十卷

崇文總目不著撰人名氏按唐志有正訓二十卷辛德源撰而此題云陸機撰又止十卷據隋以前書錄皆無陸機正訓之目晉史機傳亦不言嘗有此書而德源所著今世已亡疑是其遺書

抱朴子外篇十卷

晁氏曰晉葛稚川撰自號抱朴子博聞深洽江左絕倫著書甚富言黃白之事名曰內篇其餘外篇晉書內外通有一百一十六篇今世所傳者四十篇而已外篇頗言君臣理國用刑之道故附於雜家云

女誠一卷

陳氏曰漢曹世叔妻班昭撰固之妹也俗號女孝經

子萬機論二卷

陳氏曰魏本尉平河將濟子通撰按館閣書目十卷五十五篇今惟十五篇疑非全書也

孫子十卷

陳氏曰趙晉孫綽興公撰恐依托唐志及中興書目並無之從程文簡家借錄

劉子五卷

陳氏曰劉晝孔昭撰播州錄事參軍袁孝政為序凡五十五篇按唐志十卷劉勰撰今序云晝傷已不遇天下陵遲播遷江表故作此書時人莫知謂為劉勰或曰劉歆劉孝標作孝政之言云爾終不知晝為何代人其書近出傳記無稱莫詳其始末不知何以知其名晝字孔昭也
晁氏曰唐袁政注言脩心治身之道而辭頗俗薄

金樓子十卷

聖書

文獻通考卷三百

三

晁氏曰梁元帝撰釋書十篇論歷古興亡之迹箴戒立言
志恠雜說自敘著書要書通曰金樓子者在藩時自號
陳氏曰雜記古今聞見末一卷為自序

瑞應圖十卷

陳氏曰不著名氏按唐志有孫柔之瑞應圖記熊理瑞應
圖譜各三卷顧野王符瑞圖十卷又祥瑞圖十卷今此書
名與孫能同而卷數與顧合意其野王書也其間亦多援
孫氏以為注中興書目有符瑞圖一卷定著為野王又有
瑞應圖十卷稱不知作者載天地瑞應諸物以類分門今
書正耳未知果野王否又云或題王伯齡至李淑書目又
直以為孫柔之矣又恐李氏書別一家也

子鈔三十卷

陳氏曰梁尚書左丞穎川庾仲容子仲撰所取諸子之書

意林三卷

百有五家其間頗有與今世見行書不同者而亡者多矣
晁氏曰唐馬總會元撰初梁庾仲容取諸家書術數雜記
凡一百七家抄其要語為三十卷總以其繁略失中增損
成三軸前有戴叔倫楊伯存兩序
高氏子略曰子鈔百十有七家仲容所取或數句或一二
百言是有以契其意入其用而他人不可共享者也馬總
意林一遵庾目多者十餘句少者一二言比子鈔更為取
之嚴錄之精且約也戴叔倫序其書曰上以防守教之失
中以補比事之缺下以佐屬文之緒有疏通廣博潔淨符
信之要無僻放拘刻讖蔽邪蕩之患亦足以發其機寫其
志矣孔子曰雖小道亦有可觀是於諸子未嘗廢也聖人
既遠承學易殊義向之少純言議之多詭則百氏之為家

不能盡叶乎一亦理之所必然也當篇籍散缺人所未見之時而乃先識其名又得其語斯足以廣聞見助發揮何正嘗昂鸞啖雞蹠也陸機氏曰傾群言之瀝液漱六藝之芳潤唐章展日月如合璧賦云獵英華是庶幾焉容齋洪氏隨筆曰唐世未知尊孟子故意林亦列其書而有差不同者如伊尹不以一介與人亦不取一介於人之類其它所引書如胡非子隨巢子纏子王孫子公孫尼子阮子王部姚信士緯殷與通語牟子周生烈子秦菁子梅子任奕子魏朗子唐滂子鄒子孫氏成敗志蔣子譙子鍾子張儼默記裴氏新書袁准正書袁子正論蘇子陸子張顯析言子子顧子諸葛子陳子要言符子諸書今皆不傳於世亦有不知其名者陳氏曰總後仕至大理評事嘗副裴晉公平淮者也

知經十卷

晁氏曰唐趙蕤撰北夢瑣言云蕤梓州鹽亭人博學韜鈴長於經世夫婦俱有隱操不應辟召論王霸機權正變之術第十卷載陰謀家本缺今存者六十四篇

炙轂子雜語注解五卷

晁氏曰唐王叡撰二儀寶錄古今注載事物之始樂府題解樂府所由起叡輯纂數家之言正誤補遺劉允併歸一篇

事始三卷

晁氏曰唐劉孝孫等撰太宗命諸王府官以事名類推原初始凡二十六門以教始學諸生易大傳自始作八卦至網罟耒耨臼杵之微皆記其本起檀弓所述亦皆物之始也然則事始之書當係之儒今以其所取不一故附於雜



家

陳氏曰唐吳王諮議弘文館學士南陽劉存撰

理道要訣十卷

陳氏曰唐宰相杜佑君卿撰凡三十三篇皆設問答之辭末二卷記古今異制益於通典中撮要以便人主觀覽

造化權輿六卷

陳氏曰唐豐王府法曹趙自勳撰天寶七年表上陸農師著埤雅頗採用之其孫務觀兩嘗為跋余求之久不獲已亥歲吳門天慶觀道藏中借錄

刊語二卷

陳氏曰唐國子祭酒李諳撰

資暇集三卷

陳氏曰唐李匡文濟翁撰

書二卷

陳氏曰唐國子太學博士丘光庭撰

陳氏演義二十卷

陳氏曰唐光啓進士武功蘇鶚德祥撰此數書者皆考究書傳訂正名物辨證訛謬有益見聞尤梁谿以家藏本刻之當塗

仲蒙子三卷

陳氏曰唐校書郎長樂林慎思虔中撰

致禮書十卷

晁氏曰唐朱朴撰乾寧中為國子毛詩博士論述時務五十篇上之詞如近時策斷之類迂緩不切與馬周所建明不啻霄壤矣昭宗善其言用太宗擢周故事拔為相徒以益亂可歎也

經書

史記

六

兩同書兩卷

晁氏曰唐羅隱撰隱謂老子養生孔子訓世因本之著內外篇各五其曰兩同書者取兩者同出而異名之言也陳氏曰不著名氏中興書目云唐吳筠撰唐藝文志同但入小說類采孔老為內外十篇名祝融子兩同書祝融者謂鬻子為諸子之首也

崇文總目唐羅隱撰采孔老二書著為內外十篇以老子修身之說為內孔子治世之道為外會其旨而同元

宋齊丘化書六卷

晁氏曰偽唐宋齊丘子嵩撰張耒文潛嘗題其後云齊丘之意特大鼠之雄耳蓋不足道其為化書雖皆淺機小數亦微有以見於黃老之所謂道德其能成功有以也吾嘗論黃老之道德本於清淨無為遺去情累而其末多流而

不知術刑名何哉仁義生於恩恩生於人情聖人節此不道者也無情之至至於無親無親則忍矣此刑名之所以用也文章類高簡有可喜者其言曰君子有奇志天下不親雖聖人出斯言不廢

格言五卷

晁氏曰偽唐韓熙載叔言撰熙載以經濟自任乃著書二十六篇論古今黃伯之道以干李煜首言陽九百六之數及五運迭興事其驕雜如此有門人舒雅序

寧華古今注三卷

陳氏曰後唐太學博士馬綰撰蓋推廣崔豹之書也

續寧始五卷

晁氏曰偽蜀馮鑑廣孝孫所著

事原錄三十卷

子

文獻通考卷三百一

七

晁氏曰皇朝朱繪撰其書事始之類也

物異相感志十卷

晁氏曰皇朝僧贊寧撰采經籍傳記物類相感者志之分
天地人物四門贊寧吳人以博物稱於世柳如京徐騎省
與之游或就質疑寧楊文公歐陽文忠公亦皆知其名

陳氏曰贊寧國初名釋也

耄智餘書三卷

陳氏曰太子少保致仕澶淵晁迥德遠撰迥善養生兼通
釋老書年至八十四子孫多聞人

昭德新編一卷

陳氏曰晁迥撰昭德者京師居第坊名也晁氏子孫皆以
為稱

朱景文筆錄三卷

晁氏曰皇朝宋祁撰皆故事異聞嘉言奧語可為談助不
知何人所編每章冠以公曰景文乃祁謚也

中興藝文志筆錄三卷皇朝紹聖中宋肇次其祖庠遺語
凡一百七十條

按二筆錄卷數同祁庠又兄弟也然則一書耶二書耶
當考

近事會元五卷

陳氏曰李士友撰自唐武德至周顯德雜事細務皆記之

微言三卷

陳氏曰司馬光手抄諸子書題其末曰余此書類舉人抄
書然舉子所抄獵其辭余所抄覈其意舉人志科名余志
道德其言書迂叟言六十八蓋公在相位時也方機務填
委且將屬疾而好學不厭克勤小物如此所鈔自國語而

下六書其目三百一十有二小楷端無二筆不謹百世之下使人肅然起敬真跡藏邵康節家其諸孫邊守漢嘉從邵氏借刻携其板歸越今在其群從遵尊古家

泣坡書三卷

陳氏曰蜀人龍昌期撰稱上昭文相公有後序言求薦進之意

天保正名論八卷

陳氏曰龍昌期撰其學迂僻專非周公妄人也

事物紀原二十卷

陳氏曰不著名氏中興書目十卷開封高承撰元封中人凡二百七十事今此書多十卷且數百事是後人廣之耳

孔氏雜說記一卷

晁氏曰皇朝孔仲武撰論載籍中言前往行及國家故實

賢哲文章亦時記其所見聞著

晁氏客語一卷

陳氏曰晁說之以道撰

王氏雜說十卷

晁氏曰皇朝王安石介甫撰蔡京為安石傳其略曰自先王澤竭國異家殊由漢迄唐源流浸深宋興文物盛矣然不知道德性命之理安石奮千百世之下追堯舜三代通乎晝夜陰陽所不能測而入於神初著雜說數萬言世謂其言與孟軻相上下於是天下之士始原道德之意窺性命之端云所謂雜說卽此書也以京之夸至如此且不知所謂通乎晝夜陰陽所不能測而入於神者為何等語故著之

汲世論一卷

晁氏曰右未詳何人所著多稱元祐間事且喜論立疑呂氏書也凡十門

馭臣鑒古二十卷

晁氏曰右皇朝鄧綰撰元豐中為中丞獻之朝未幾坐操心頗僻賦性姦回論事薦人不循分守是

廣川家學三十卷

陳氏曰中書舍人董分今升撰述其父造文學

蘇文定公遺言

蘇轍子由撰周平原序略曰文定公晚居許昌造深矣避禍謝客縱有門人亦罕與言其聞緒論者子孫而止耳然諸子宦游惟長孫將作監丞仲滋諱簡十有四才識卓然侍左右者九年記遺言百餘條未嘗增損一語既老以授其子郎中君謝郎中復以授其子道州史君森予嘗與

道州同僚故請題其後

人知黃樓賦非出公手更坡蓋

親為之辨今公自謂此賦兩都晚年不復作此三夫之

又至和陶擬古九首則此坡代作識者當自得之又云

讀書須學為文餘事作詩然公詩自工謂備光義高厚以

陶淵明平處似王摩詰而以韓子蒼比之子蒼由是知名

公素不作長短句今漁家傲一篇雖用禪語而句法極高

乃知公非不能詞直不為耳此皆學者所宜知也

石林家訓一卷

陳氏曰葉夢得少蘊撰

石林漫錄二十七卷

陳氏曰葉夢得與諸子講說者其中子模編輯之

程氏廣訓六卷

陳氏曰中書舍人三衢程俱致道撰

文獻通考卷三百四

文獻通考卷三百四

七

藝苑雌黃二十卷

陳氏曰建安嚴有真撰八抵辨正訛謬故曰雌黃其目子史倬注詩詞時序名數聲畫器用地理動植神怪雜事卷為二十條凡四百餘視固居士唐稷序之有翼常分考泉

荆二部

相素雜說十卷

吳氏曰皇朝黃朝共撰所記二百事朝英建州人紹聖後舉子也為王安石之學者以贈之以芍藥為男淫女貽我握椒為女淫男鄙之秋不與前輩嘗以是為嗤笑朝英特愛重之以為得詩人深意其他可知矣

陳氏曰陳與者為之序言甲辰六 史部不利蓋政宣中

士子也其書亦辨正名物而學頗之解

程氏洪繁露曰此書辨正世傳名物音義多有歸宿而時

有疑者至釋宋子京刈麥詩以四月為麥秋而曰按此史蘇綽傳麥秋在野其名遠矣是未嘗讀月令也以此知

博記之難

聖賢眼目一卷

陳氏曰曲阿洪興祖慶善撰摘取經子數十條以已見發明之

義林一卷

陳氏曰眉山程敦厚子山撰其一世東坡外家也子山為人凶險附秦檜至右史後坐謫死

演繁露十四卷續十卷

陳氏曰程大昌泰之撰初在館中見蕃露書以為非說見春秋類入引古今注冕旒綴玉下重如繁露然蓋與玉杯竹林同為托物名篇可想見也今日演繁露者意古之蕃

露與爾雅釋名書雅刊誤正俗之類云耳

考古編十卷續編十卷

陳氏曰程大昌撰上自詩書下及史傳世俗雜事有可攷見者皆筆之

楚澤叢語八卷

陳氏曰右迪功郎李善言光撰不知何人作其書專關孟子紹興中撰進大意以為王氏之學出於孟子然王氏信有罪矣孟氏何與焉此論殆得於景迂之微意

峇齋隨筆續筆三筆四筆各十六卷五筆十卷

陳氏曰翰林學士番陽洪邁景盧撰每編皆有小序五筆未成書

朱子語錄曰洪景盧隨筆中辨得數種偽書皆是但首卷載歐帖事却非實世間偽書如西京雜記顏師古已辨之

矣

續顏氏家訓八卷

陳氏曰左朝請大夫李正公撰皆用顏氏篇目而增廣之習學記言五十卷

陳氏曰閣學士龍泉葉適正則撰自六經諸史子以及文鑑皆有論說大抵務為新奇無所蹈襲其文刻峭精工而義理未得為純明正大也自孔子之外古今百家隨其淺深咸有遺論無得免者而獨於近世所傳子華子篤信推崇之以為真與孔子同時可與六經並考而不悟其為偽也且既曰其書甚古而文與今人相近則亦知之矣遠自七略及隋唐國史諸志李邕鄆諸家書目皆未之有豈不足以及驗其非古出於近世好事能文者之所為而反謂孟荀以來無道之者蓋望而棄之也不亦惑乎

生齋雜說一卷

陳氏曰錢唐吳如愚撰

灌畦暇語一卷

陳氏曰不知作者雜取史傳事略述己意

忘筌書二卷

陳氏曰潘植子醇撰新安所刻本凡八十一篇與館閣書目諸儒鳴道集及余家寫本篇數皆不同本已見儒家而館目置之雜家者以其多用釋老之說故也今亦別錄於此

袁氏世範三卷

陳氏曰樂清令三衢袁采君載撰

文獻通考卷之二百十四

文獻通考卷之二百十五

宋鄱陽 馬端臨 貴與 著

明蘄陽 馮天馭 應房 校刊

經籍考 子小說家

燕丹子三卷

中興藝文志丹燕王喜太子此書載丹與荆軻事

周氏涉筆曰荆軻事既卓偉傳記所載亦甚掘竒今燕丹子三篇與史記皆相合似是史記事本也然烏頭白馬生角機橋不發史記以怪誕削之進金擲鼃膾千里馬肝截美人手史記以過當削之聽琴姬得隱語史記以徵所聞削之史遷不獨文字雄深至於識見高明超出戰國以後其書及削百家誣謬亦豈可勝計哉今世祇謂太史公多好亦未然也又如許由伊尹范蠡亦多疑辭惟信孔氏門

人傳錄大過如五帝本紀孔子世家其間秕妄居多是未能充其類

神異經一卷

陳氏曰稱東方朔撰張茂先傳

十洲記一卷

晁氏曰漢東方朔撰班固贊言朔之談諧逢占射覆其事浮淺童兒牧豎莫不眩耀而後世好事者因取奇言怪語附著之朔豈謂此書之類乎

陳氏曰亦稱東方朔撰二書詭誕不經皆假托也漢晉本傳叙朔之辭末言劉向所錄朔書具是矣世所傳他事皆非也贊又言朔之談諧其事浮淺行於衆庶而後世好事者因取奇言怪語附著之朔故詳錄焉史家欲祛妄惑可謂明矣

洞冥記四卷拾遺一卷

晁氏曰後漢郭憲子橫撰其序言漢武明雋特異之主東方朔因滑稽浮誕以匡諫洞心於道教使冥跡之奧昭然顯著故曰洞冥

陳氏曰題漢武別國洞冥記其別錄又於御覽中抄出然則四卷亦非全書也凡若是者藏書之家備名數而已無之不足為損有之不足為益况於詳略尤非所計也唐志入神僊家

周廬注博物志十卷 盧氏注六卷

殷文奎啓注晉張華讀三十車書作博物志四百武帝以為繁只作十卷

晁氏曰晉張華撰載歷代四方奇物異事兩本前六卷略同無周氏注者稍多而無後四卷周名日用西京賦曰小

說九百起自虞初周人也其小說之來尚矣然不過志夢卜紀譎怪記談諧之類而已其後史臣務采異聞往往取之故近時為小說者始多及人之善惡甚者肆喜怒之私變是非之實以誤後世至于譽相溫而毀陶侃褒盧杞而貶陸贄者有之今以志怪者為上褒貶者為下云

陳氏曰其書作奇聞異事華能辨龍鮓識劍氣其學固然也
王子年拾遺記十卷
晁氏曰梁蕭綺叙錄晉王嘉字子年嘗著書百二十篇載伏羲以來異事前世奇詭之說書逸不完綺綴拾殘缺而叙之

名山記一卷

陳氏曰亦稱王子年節前之第十卷大抵皆詭誕嘉符秦

人見晉書藝術傳

世說新語十卷重編世說十卷

晁氏曰宋劉義慶撰梁劉孝標注東漢以後事分三十八門唐藝文志云劉義慶世說八卷劉孝標續十卷而崇文總目止載十卷當是孝標續義慶元本八卷通成十卷耳家本有二一極詳一殊略略有稱改正未知誰氏所定然其目則同劉知幾頗言此書非實錄予亦云

陳氏曰今本三卷叙錄二卷叙錄者近世學士新安汪藻彥章所為也首為考異繼列人物世譜姓字異同末記所引書目按唐志作八卷劉孝標續十卷自餘諸家所藏卷第多不同叙錄詳之此本董令升刻之嚴州以為晏元獻公手自校定刪去重複者

高氏緯略曰義慶采摭漢晉以來佳事佳話為世說新語

極爲精絕而猶未爲奇也梁劉孝標注此書引援詳確有
不言之妙如引漢魏吳諸史及子傳地理之書皆不必言
共如晉氏一朝史及晉諸公別傳譜錄文章凡一百六十
六家皆出於正史之外紀載特詳聞見未接寔爲注書之
法

殷芸小說十卷

晁氏曰宋殷芸撰述秦漢以來雜事予家本題曰劉餗李
淑以爲非

陳氏曰邯鄲書目云或題劉餗非也今此書首題秦漢魏
晉宋諸帝注云齊殷芸撰非劉餗明矣故其叙事止宋初
蓋於諸史傳記中抄集或稱尚芸者宣祖廟未祧時避諱
也

述異記二卷

晁氏曰梁任昉撰昉家藏書三萬卷天監中采輯前世之
事纂新述異皆時所未聞將以資後來屬文之用亦博物
之意唐志以爲祖同所撰誤也

續齊諧記二卷

陳氏曰梁秦朝請吳均撰齊諧志怪本莊子語也唐志又
有東陽無疑齊諧志今小傳此書殆續之者歟

北齊還冤志二卷

陳氏曰顏之推撰

古今同姓名錄一卷

陳氏曰梁元帝撰有陸善經者續之至五代時

隋唐嘉話一卷 劉餗小說三卷

陳氏曰並唐右補闕劉餗鼎卿撰

博異志一卷

晁氏曰題曰谷神十篋序稱其書頗歲規時事故隱姓名或曰名還古而竟不知其姓志怪之書也

卓異記一卷

晁氏曰唐李翱撰或題云陳翱開成中在襄陽記唐室君臣功業殊異者二十之類

陳氏日記當時君臣占絕盛事

集異記二卷

晁氏曰唐許用弱撰惟不隋唐間談詭之事一題古異記首載徐佐卿化鶴事

陸氏集異記二卷

晁氏曰唐陸勳纂語怪之書也凡三十二事言大怪者居三之一

稽神異苑十卷

晁氏曰題云南齊焦度撰雜傳記鬼神變化及草木禽獸妖怪譎詭事按焦度南齊人也質訥朴慙以勇力事高帝決不能著書又卒於建元四年而所紀有梁天監中事必非也唐志有焦露窮神秘法十卷豈即此書而相傳之訛歟

朝野僉載補遺三卷

晁氏曰唐張鷟文成撰分三門五門載唐朝雜事鷟自號浮休子蓋取莊子其生也浮其死也休之義

容齋洪氏曰僉載紀事皆瑣尾擿裂且多牒語

陳氏曰其書本三十卷此特其節略耳別求之未獲

冥報記二卷

陳氏曰唐吏部尚書涼州北庭臨本德撰

辨疑志三卷

陳氏曰唐宣武行軍司馬陸長源撰辨俚俗流傳之妄

宣室志十卷

晁氏曰唐張讀聖明撰纂錄僊鬼靈異事名曰宣室志者取漢文召見賈生論鬼神之義苗台符為之序

封氏見聞記五卷

晁氏曰唐封演撰分門記儒道經籍人物地理雜事且辨說訛謬蓋著其所見聞如此

陳氏曰前紀典故末及雜事頗有可觀

劉公嘉話一卷

晁氏曰唐韋絢撰劉公謂禹中節度義武幼從學於禹其話言

晁氏曰唐韋詢撰

太和為李德裕從事記德裕所談

平泉草木記一卷

晁氏曰唐李德裕撰記其別墅奇花異草樹石名品仍以數詠其美者詩二十餘篇附于後平泉即別墅姓名

玄怪錄十卷

晁氏曰唐牛僧孺撰僧孺為宰相有聞于世而著此等書周秦行紀之謗蓋有以致之也

陳氏曰唐志十卷又言李復言續錄五卷館閣書目同今

但有十一卷而無續錄

續玄怪錄十卷

晁氏曰李復言續僧孺書分仙術感應二門

周秦行紀一卷

孫甫

又

本

晁氏曰唐牛僧孺自叙所遇異事賈黃中以為韋瓘所撰
瓘李德裕門人以此誣僧孺

洽聞記三卷

晁氏曰唐鄭常撰記古今神異詭譎事凡百五十六條或
題曰鄭遂

甘澤謠一卷

晁氏曰唐袁郊撰載譎異事九章咸通中久雨卧疾所著
故曰甘澤謠

陳氏曰咸通戊子自序以其春用澤應故有甘澤成謠之
語以名其書

河東記三卷

晁氏曰唐薛漁思撰亦記譎怪事序云續生僧孺之書

酉陽雜俎二十卷續酉陽雜俎十卷

晁氏曰唐段成式撰自序云縫掖之徒及怪及戲無侵於
儒詩書為大美史為折俎子為醯醢大小二酉山多藏奇
書故名篇曰酉陽雜俎分三十門為二十卷其後續十卷
陳氏曰所記固多譎怪其標目亦奇詭如天咫玉格壺史
貝編尸窆之類成式文昌之子

因話錄六卷

晁氏曰唐趙璘撰字澤章大中時為衢州刺史記唐史逸
事

劇談錄三卷

晁氏曰康駢字駕言撰乾符中登進士第書成載唐世故
事

唐語林十卷

晁氏曰未詳撰人效世說體分門記唐世名言新增嗜好

等十七門餘皆仍舊

史話三卷

晁氏曰不題撰人自後漢及江左朝野雜事皆記之

資暇三卷

晁氏曰唐李匡義齊翁撰序稱世俗之談類多訛誤雖有見聞嘿不敢證故著此書上篇正誤中篇譚原下篇本物以資休暇云

芝田錄一卷

晁氏曰叙謂嘗憇緱氏故取潘岳西征賦名其書記隋唐雜事未詳何人摠六百條

朝廷卓絕事一卷

晁氏曰唐陳峴撰記唐朝忠賢卓絕五十事

杜陽雜編三卷

晁氏曰唐蘇鶚字德祥撰光啓中進士家武功杜陽川雜錄廣德以至咸通時事

雲溪友議三卷

晁氏曰唐范攄撰記開元以後事攄五溪人故以名其書陳氏曰咸通時人唐志三卷今存十二卷

談賓錄十卷

晁氏曰唐朝璩子溫撰皆唐朝史之所遺文武間人

乾牒子三卷

晁氏曰唐溫庭筠撰序謂語怪以悅賓無異牒呖之適口故以乾牒名書陳氏曰叙言不爵不觥非多能悅諸心聊甘衆口庶乎乾牒之義牒與饌同字從肉見古禮經

尚書故實一卷

尚書故實一卷

晁氏曰唐李緯編崇文摠目謂尚書即張延賞也緯記延賞所談故又題曰尚書談錄按其書稱嘉貞為四世祖疑非延賞也

陳氏曰其書首言賓護尚書河東張公三代相門謂嘉貞延賞弘靖弘靖盧龍失御貶賓客分司緯唐末人未必及弘靖弘靖之後文規次宗彥遠皆不登八座未詳所謂唐志即以為延賞尤不然

家學要錄一卷

晁氏曰唐柳珪采其曾祖彥昭祖芳父冕家集所記累朝典章因革時政得失著此錄小說之尤者也

常侍言指一卷

晁氏曰唐柳珪記其世父芳所著凡十六章末有劉出求及上清傳附

異聞集十卷

晁氏曰唐陳翰編以傳記所載唐朝奇怪事類為一書陳氏曰唐末人見唐志而第七卷所載王魁乃本朝事當是後人勦入之耳

聞奇錄一卷

陳氏曰不著名氏當是唐末人

松窓錄一卷

晁氏曰唐韋叡撰記唐朝故事

瀟湘錄十卷

陳氏曰校書郎李隱撰館閣書目云耳唐志作柳詳未知書目何據也

幽閑鼓吹一卷

晁氏曰唐張同撰紀唐史遺書二十五篇懿僖間人

知命錄一卷

陳氏曰唐劉愿撰凡二十事

前定錄一卷

陳氏曰唐崇文館校書鍾輅撰凡二十二事別本又有續錄二十四事

雜纂一卷

陳氏曰唐李商隱義山撰俚俗常談鄙事可資戲笑以類相從今世所稱殺風景蓋出於此又有別本稍多皆後人附益

巽岩李氏曰用諸酒杯流行之際可謂善謔其言雖不雅馴然所訶諷多中俗病聞者或足以為戒不但為笑也

盧氏雜說一卷

陳氏曰唐盧言撰

陳氏曰段成式撰為吉州刺史時

唐缺史三卷

陳氏曰唐高彥休撰自號參寥子乾符中人

北里志一卷

晁氏曰唐孫棨撰記大中進士游俠平章事孫光憲言棨之意在譏盧相橋也蓋橋之女與其甥通橋知之遂以妻之殺家人以滅曰云

玉泉筆端三卷 又別一卷

陳氏曰不著名氏有序中和三年作末有跋云扶風李昭德家藏之書也即故淮海相公孫又稱黃巢陷洛之明年跋亦不知何人別一本號玉泉子比此本少數條而多五十二條無序跋錄其所多者為一卷

子

十

三水小牘三卷

陳氏曰唐皇甫牧遵美撰天祐中人三水者安定屬邑也
醉鄉日月三卷

陳氏曰唐皇甫松子奇撰唐人飲酒令此書詳載然今人
皆不能曉也

龍城錄一卷

陳氏曰稱柳宗元撰龍城謂柳州也羅浮梅花夢事出其
中唐志無此書蓋依托也或云王銍性之作

朱子語錄曰柳文後龍城錄雜記王銍之為也子厚敘事
文字多少筆力此記衰弱之甚皆寫古人詩文中不可曉
知底於其中似暗影出

唐朝新纂三卷

陳氏曰融州副史石文德撰

秘纂一卷

陳氏曰無名氏所錄五事其扶錄國王一則所謂蛇須客
者也

樹萱錄一卷

陳氏曰不著名氏序稱纂尚書滎陽公所談者亦不知何
人又云晉聖園丘之明年晉聖者僖宗由晉王踐位也書
雖見唐志今亦未必本真或云劉燾無言所為也

續樹萱錄一卷

容齋洪氏隨筆曰頃在秘閣抄書得續樹萱錄一卷其中
載隱君子元撰夜見吳王夫差與唐諸詩人吟詠事李翰
林詩曰芙蓉露濃紅壓枝幽禽感秋花啼啼玉人一去未
回馬深間燕子三見歸張司業曰綠頭鴨兒匝萍藻採蓮
女郎笑花老杜舍人曰鼓鼙夜戰北邊風霜葉沿階貼亂

紅三人皆全篇杜工部曰紫領寬袍漉酒巾江頭蕭散作
閑人白少傅曰不因霜葉辭林去的當山翁未覺秋李賀
曰魚鱗甃空排嫩碧露桂梢寒掛團壁三人皆未終篇細
味其體格語句往往逼真後閱秦少游集有秋興九首皆
擬唐人前所載或在焉關子東為秦集序云擬古數篇曲
盡唐人之體正謂是也何子楚云續登錄乃王性之所作
而托名他人今其書才有三事其一曰賈博論一曰全若
虛一曰元撰詳命名之義蓋取諸子虛亡是公云

雲僊散錄一卷

陳氏曰稱唐金城馮贄撰天復元年叙馮贄者不知何人
自言取家世所蓄異書撮其異說而所引書名皆古今所
不聞且其記事造語如出一手政如世俗所行東坡杜詩
注之類然則所謂馮贄者及其所蓄書皆子虛烏有也亦

可謂枉用其心者矣

洪氏容齋隨筆曰俗間所傳淺妄之說如所謂雲仙散錄
老杜事實之類皆絕可笑然士大夫或信之孔傳續六
帖采摭唐事殊有工而悉載雲仙錄中事自穢其書近世
南劍州李刊散錄可毀

進考卷之二百十六

宋鄱陽 馬 端臨 貴與 著

明蘄陽 馮 天馭 應房 校刊

經籍考 子 小說家

傳奇三卷

晁氏曰唐裴鉞撰唐志稱鉞高駢客故其書所記皆神仙
妖譎事駢之惑呂用之未必非鉞輩導諛所致

陳氏曰尹師魯初見范文正岳陽樓記曰傳奇體耳然文
體隨時理勝為貴文正豈可與傳奇同日語哉蓋一時戲
笑之談耳唐志三卷今六卷皆後人以其卷帙多而分之
也

撫言十五卷

晁氏曰唐王定保撰分六十三門記唐朝進士應舉登科

經籍考 子

文獻通考卷二百十六

一

崇禎三年重刊

雜事

陳氏曰定保光化三年進士為吳融子華墻喪亂後入湖南棄其妻弗顧士論不齒

金華子三卷

晁氏曰唐劉崇遠授金華子其自號蓋慕皇初平為人也錄唐大中後事一本題曰劉氏雜編

陳氏曰崇遠五代時人仕至大理司直

北夢瑣言二十卷

晁氏曰荆南孫光憲授光憲蜀人從楊玘元證遊多聞唐世賢哲言行因纂輯之且附以五代十國事取傳由於江南之夢白以為高氏從事在荆南之北故命編云

陳氏曰光憲仕荆南高從誨為黃州刺史三世在幙府後隨繼冲入朝有薦於太祖者將用為學士未及而卒光憲

自號葆光子

皮氏見聞錄五卷

晁氏曰五代皮光業撰唐末為餘杭從事記當時詭異見聞自唐乾符四年迄至吳天福二年自號鹿門子

耳目記一卷

陳氏曰無名氏撰書目云劉氏撰未詳其名記唐末以後事

紀聞談三卷

陳氏曰行潘遠撰館閣書目按李淑作潘遺今考邯鄲書目亦作潘遠其曰遺者本誤也所記隋唐遺事

鑑戒錄十卷

晁氏曰後蜀何光遠撰字輝夫東海人唐證中纂輯唐以來君臣事迹可為世鑒者則有劉隱度序李獻臣云不知

何時人考之不誤也

葆光錄三卷

陳氏曰陳纂撰自號襲明子所載多吳越事當是國初人

後史補三卷

陳氏曰前進士高欲拙撰

野人閑話五卷

陳氏曰成都景煥撰記孟蜀時事乾德三年序

續野人閑話二卷

陳氏曰不知作者

稽神錄六卷

晁氏曰南唐徐鉉撰記怪神之事序稱自乙未歲至乙卯凡二十年僅得百五十事楊大年云江東布衣蒯亮好大言夸誕鉉喜之於甲子門下稽神錄中事多亮所言

陳氏曰元本十卷今無卷第摠作一卷當自是他書中錄出者

賈氏談錄一卷

晁氏曰南唐張洎奉使來朝錄賈黃中所談三十餘事歸獻其主

燈下閑談二卷

陳氏曰不知作者

啓顏錄八卷

陳氏曰不知作者雜記恢諧調笑事唐志有侯白啓顏錄十卷未必是此書然亦多有侯白語但訛謬極多

開顏集三卷

陳氏曰校書郎周文規撰未知何時人以古笑林多猥俗乃於書史中抄出可資談笑者為此篇

唐摭言十五卷

陳氏曰鄉貢進士何晦撰其序言太歲癸酉下第於金陵鳳臺旅舍癸酉者開寶六年也時江南獨未下晦蓋其國人數

洛陽搢紳舊聞記十卷

陳氏曰丞相曹國張齊賢師亮撰所錄張全義治洛事甚詳

太平廣記五百卷

晁氏曰皇朝太平興國初詔李昉等取古今小說編纂成書同太平御覽上之賜名廣記
夾漈鄭氏曰太平廣記乃太平御覽中別出廣記一書專記異事

鹿茸事類三十卷鹿茸文類三十卷

晁氏曰節太平廣記事實成一編曰事類詩文成一編曰文類蔡蕃晉如所撰晉如博學通書音律能屬文與十父相友善

洛中記異十卷

晁氏曰皇朝秦用思記五代及國初識應雜事

洞微志十卷

晁氏曰皇朝錢希白述記唐以來詭譎事

清異錄二卷

陳氏曰稱翰林學士陶穀撰凡天文地理花木飲食器物每事皆制為異名新說其為書殆似雲仙散錄而語不類國初人蓋假托也

乘異記三卷

晁氏曰皇朝張君房撰其序謂乘者載記之名異者非常

之事蓋志鬼神變恠之書凡十一門七十五事

陳氏曰咸平癸卯序取晉之乘之義也君房又有脞說家
偶無之晁公武讀書志以脞說為張唐英君房撰又言君
房著名臣撰蜀檮杌雲笈七籤行于世按君房祥符天禧
以前人楊大年改閑忙今所謂紫微失却張君房者即其
人也嘗為御史屬坐鞠獄貶秩因編修七籤得著作佐郎
七籤序自言君房蓋其名非字也唐英字次功熙豐間人
丞相商英天覺之兄作名臣傳蜀檮杌者與君房了不相
涉不知晁何以合為一人也其誤明矣

括異記十卷

晁氏曰皇朝張師正撰師正擢甲科得太常博士後游宦
四十年不得志於是推變恠之理參見聞之異得二百
十篇魏泰為之叙

祝異志十卷

晁氏曰皇朝聶田撰田天禧中進士不中第至元祐初因
記近時說聞異見一百餘事天禧至元祐七十餘年田且
百歲矣康定元年序

楊父公談苑八卷

晁氏曰皇朝宋庠編初楊公億里人黃鑑哀撰平生異聞
為一編庠取而刪類之分為二十一門

陳氏曰鑑書初名南陽談數宋公刪其重複改曰談苑

歸田錄十卷

晁氏曰皇朝李昉蜀人張詠客也與范鎮友善熙寧中致
仕歸與門人賓客燕談忘倦門人請編錄之又名該聞錄
書目解題又有雜詩十二篇係于後

江鄰幾雜志三卷

晁氏曰皇朝江休復撰休復歐陽永叔之執友其所紀精博絕人遠甚鄰幾其字也又名嘉祐雜志
閑談錄兩卷

晁氏曰皇朝蘇耆撰舜卿之父也記五代以來雜事下秩多載馮道行義

文會談叢一卷

陳氏曰題華陽上官融撰不知何人天聖五年序

國老閑談二卷

陳氏曰稱夷門君王撰不著姓

東齋記十卷

晁氏曰皇朝范鎮景仁撰元豐中序言既謝事日於東齋燕坐追憶在朝時交游言語與夫俚俗傳記因纂集成一篇崇觀間以其及國朝故事禁

春秋退朝錄三卷

晁氏曰皇朝宋敏求次道撰多記國朝典故其序云熙寧三年予奉朝請于春明里因纂所聞也

南遷錄二卷

晁氏曰皇朝張舜臣芸叟撰舜民元豐中從軍攻靈州師還謫授柳州監酒即日之官記塗中所歷并其詩文

夢溪筆談二十六卷

晁氏曰皇朝沈括存中撰括好功名城未樂不克貶死而實才高博學多技能音律星曆尤邃自序云退處林下深居絕過從所與談者惟筆硯而已故以名其書凡十七目

志懷錄三卷

晁氏曰皇朝元豐中夢一丈人撰所集皆飲食器用之式種藝之方可以資山居之樂者或云沈括也

陳氏曰括坐承樂事閑發晚歲乃以光祿卿分司卜居京
口之夢溪有水竹山林之適少有懷山錄可資居山之樂
者輒記之自謂今可忘于懷矣故易名志懷錄

郡閣雅言一卷

晁氏曰皇朝潘若同撰太宗時守郡與僚佐話及南唐野
史皆異事佳言輒疏之于書凡五十六條以資雅言或
題曰郡閣雅談書錄解題作郡閣雜言題脊善大夫潘欲
冲撰

秘閣閑談五卷

晁氏曰皇朝吳淑撰記秘閣同僚燕談淑仕南唐後
煜降丹陽人

牧豎閑談三卷

晁氏曰皇朝景漁纂十九事景漁蜀人也

幙府燕閒錄十卷

晁氏曰皇朝畢仲詢撰仲詢元豐初嵐州推官纂當代怪
奇可喜之事爲二十門

歸田錄二卷

陳氏曰歐陽修撰或言公爲此錄未傳而序先出裕陵索
之其中本載時事及所經歷見聞不敢以進旋爲此本而
初本竟不復出未知信否公自爲序略曰歸田錄者朝廷
之遺事史官之所不記與夫士大夫笑談之餘而可錄者
錄之以備閑居之覽也又曰唐李肇國史補序云言報應
叙鬼神流夢卜近帷箔悉去之記事實探物理辨疑惑示
勸戒采風俗助談笑則書之余之所錄大抵以肇爲法而
小異於肇者不書人之過惡以謂職非史官而掩惡揚善
君子之志也覽者詳之

歸田後錄十卷

陳氏曰朝請郎廬江先定國與仲撰熙豐間人竊取歐公舊錄之名實不相關也

清夜錄一卷

陳氏曰沈括撰

續清夜錄一卷

陳氏曰王銍性之撰

苔川子所記三事一卷

陳氏曰不知何人三事者勃率姑王之林果毅皆異事也末有韓蟲兒一事是歐陽公所記偶錄附此

補妬記一卷

晁氏曰古有妬記久而亡之不知何人輯傳記中婦人嚴妬事以補亡

陳氏曰稱京兆王績編不知何時人古有宋虞之妬記等今不傳故補之自商周而下迄五代史傳所有妬婦皆載之末及神怪雜說文論等最後有治妬二方尤可笑也

茅屋客話十卷

晁氏曰皇朝黃休復撰茅亭其所居也暇日賓客話言及虛無變化語俗卜筮雜異端而合道旨屬懲勸者皆錄之陳氏曰其所記多蜀事別有成都名畫記蓋蜀人也

褒善錄一卷

晁氏曰皇朝王蕃撰嘉祐中巴縣簿黃靖國死而復蘇道其真中所見廖生嘗傳之蕃刪取其要為此書

吉凶影響錄十卷

晁氏曰皇朝岑象求編象求熙寧末間居江陵披閱載籍見善惡報應事輒刪潤而記之間有聞見者難乎備載亦

采摛著于篇

勸善錄六卷

晁氏曰皇朝周明寂元豐中纂道釋神奇禍福之效前人
為傳記者成一編以戒世

勸善錄拾遺十五卷

晁氏曰不題撰人疑亦明寂所纂僅百事

鷄跖集十卷

晁氏曰未詳撰人所集書傳中瑣碎佳事分明編次之准
南子曰善學者如齊王食鷄必食其跖名書之意殆以此
三百家事類六十卷

晁氏曰分門編古今稗官小說成一書雖曰該博但失於
太略不題撰人

漁樵閑話二卷

晁氏曰設漁樵問答及史傳雜事不知何人所為
青瑣高議十八卷

晁氏曰不題撰人載皇朝雜事及名士所撰記傳然其所
書辭意頗鄙淺

悅神集一卷

晁氏曰不題撰人記滑稽之說唐有邯鄲淳笑林此其類
也

廣卓異記二十卷

陳氏曰樂史子正撰

王原叔談錄一卷

陳氏曰翰林學士南京王洙之子錄其父所言

湘山野錄三卷續三卷

晁氏曰皇朝熙寧中吳僧文瑩撰記國朝故事

經籍

子

文獻通考卷三百六

九

崇禎三年重刊

玉壺清話十卷

晁氏曰皇朝僧文瑩元豐中撰自序云瑩收國初至熙寧中文集數千卷其間神道墓誌行狀實錄奏議之類輯其事成一家言玉壺者其隱居之潭也

延漏錄一卷

陳氏曰不著名氏其間稱伯父郇公知其為章得象之姪也後題此書疑章望之作然未敢必望之者字表民用郇公廢入官歐陽公為作字說者也以宰相嫌遂不仕錄中又記皇祐中與滕元發同試南廟滕首冠而已被黜籍令非望之亦當時場屋有聲者章氏雋才固多也

紀聞一卷

陳氏曰集賢殿修撰李復圭審言撰淑之子也

東坡手澤二卷

陳氏曰今俗本大全集中所謂志林者也

史子之卷

陳氏曰相傳為東坡作未必然也

龍川略志六卷龍川別志四卷

晁氏曰皇朝蘇轍撰轍元符二年夏居循州杜門閉目追惟平昔使其子遠書之于紙凡四十事其秋復記四十七事龍川循州地名

古今前定錄二卷

晁氏曰皇朝尹國均輯經史子集古今之人興衰窮達貴賤貧富死生壽夭與夫一動靜一語默一飲一啄定於前而形于夢兆於卜見於相貌應於識記者凡一門以為不知命而躁競者之戒至若裝度以陰德而致貴孫亮以陰譴而減齡之類又別為二門使君子不以天廢人云

澠水燕談十卷

晁氏曰皇朝王闕紹聖間撰澠水其退居之地也闕從仕四方與賢士大夫燕談有可取者輒記之久而得三百六十餘事

陳氏曰澠齊水名左傳有酒如澠闕治平四年進士

逆旅集

淮海秦觀撰自序曰余閑居有所聞輒書記之既盈編軸因次爲若干卷題曰逆旅集蓋以其智愚好醜無所不存彼皆隨至隨往適相遇於一時竟亦不能久其留也或曰吾聞君子言欲純事書欲純理詳於誌常而略於紀異今子所集雖有先王之餘論周孔之遺言而浮屠老子卜醫夢幻神仙鬼佛之說猥雜於其間是否莫之分也信誕莫之質也常者不加詳而異者不加略也無乃與所謂君子

之書言者異乎余笑之曰鳥栖不擇山林惟其木而已魚遊不擇江河惟其水而已彼計事而處簡物而言切切然去彼取此者縉紳先生之事也僕野人也擁腫是師懈息是習仰不知雅言之可愛俯不知俗論之可卑偶有所聞則隨而記之耳又安知其純與駁邪然觀今世謂其言是則矍然改容謂其言信則適然以喜而終身未嘗信也則又安知彼之純不爲駁而吾之駁不爲純乎且萬物歷歷同歸一隙衆言喧喧同歸一源吾方與之沉與之游欲有取舍而不可得何暇是否信誕之擇哉子往矣客去遂以爲序

傅公嘉話一卷

晁氏曰皇朝傅堯俞之子孫記堯俞之言行凡四十餘章獻簡堯俞謚也

會公南遊記一卷

晁氏曰會公未詳何人當是公亮之孫也共十二章記國朝雜事

縉紳先生說二十卷

晁氏曰皇朝張唐英君房撰君房博學通釋老善著書如名臣傳蜀檣杙雲笈七籤行于世者母慮數百卷此書亦詳實

稗官志一卷

晁氏曰皇朝呂大辨雜記其所聞前言往行

倦游雜錄八卷

晁氏曰右皇朝元豐初張師正撰序言倦遊云者仕不得志聊書平生見聞將以信于世也自以非史官雖書善惡而不敢褒貶

筆錄十五卷續錄一卷

晁氏曰右皇朝魏泰撰襄陽人曾布之婦弟為人無行而有口頗為鄉里患苦元祐中紀其少時公卿間所聞成此編其所是非多不可信心喜章惇數稱其長則大槩已可見又多妄誕姑舉其一如謂王沂公登甲科劉子儀為翰林學士嘗戲之按沂公登科雖在子儀後四年其入翰林沂公反在子儀前七年沂公咸平五年登科子儀天禧三年始除學士蓋相去二十年其謬至此

王氏曰魏泰者場屋不得志喜偽作它人著書如志怪集括異志倦游錄盡假名武人張師正又不能自抑出其姓名作東軒筆錄皆用私喜怒詆讟前人最後作碧雲駮假作梅堯臣毀及范仲淹而天下駭然不服矣詳見碧雲駮條下

宋鄱陽 馬端臨 貴與 著
明蘄陽 馮天馥 應房 校刊
子小 說家
文獻通考卷之二百十七
東坡筆錄十卷 蘇軾 一卷

文獻通考卷之二百十七

宋鄱陽 馬端臨 貴與 著

明蘄陽 馮天馥 應房 校刊

子小 說家

師友談記一卷

晁氏曰皇朝李廌方叔撰多記蘇子瞻范純夫及四學士
所談論故曰師友

青箱雜記十卷

晁氏曰皇朝吳處厚撰處厚發蔡確車蓋亭詩所記多失
實成都置交子務起於寇瑛處厚乃以為張詠宅多類此
冷齋夜話六卷

晁氏曰皇朝僧惠洪撰多記蘇黃事皆依託也江淹擬陶

淵明詩其詞浮淺洪既誤以為真淵明語且云東坡嘗稱

其至到鬼谷子書世所共見而云有崖蜜櫻桃也之言東坡橄欖詩已輸崖蜜十分甜蓋用之如此類甚多不可槩舉

陳氏曰未詳何人撰記國初至熙寧中雜事

涿齋閑覽十四卷 劔溪野語三卷

晁氏曰皇朝程正敏嘗觀間撰正敏自號涿翁錄其平昔

所見聞分十門為小說一編以備異日披閱

張芸叟雜說一卷 畫墁集一卷

陳氏曰並吏部侍郎張舜民芸叟撰

洛游子一卷

陳氏曰題司馬光非也所稱樂余子齊物子亦莫知何人

塵史三卷

陳氏曰司農少卿安陸王得臣彥輔撰嘉祐四年進士其

序稱政和乙未行年八十自號鳳臺子蓋王昭素之後王銍性之之伯也揮塵錄誤載

蘇氏談訓十卷

陳氏曰朝請大夫蘇象先撰述其祖魏公頌子容遺訓

續世說十二卷

陳氏曰孔平仲毅父撰編宋至五代事以續劉義慶之書

孫公談圃三卷

陳氏曰臨江劉延世錄高郵孫升君孚所談升元祐中書

舍人坐黨謫汀州

履情集二十卷

晁氏曰皇朝張君房唐英編古今情感事

烏臺詩話十三卷

陳氏曰蜀人朋九萬錄東坡下御史獄公案附以初舉發

章疏及謫官後表章書啓詩詞等

瑋石雲駮一卷

晁氏曰皇朝梅堯臣聖俞撰昭陵時有御馬名碧雲駮以旋毛貴用以名書者詆當時鼎貴之人然其意專在范文正也頃年獲拜趙氏姑于恭南因質此事之誕信荅曰異哉聖俞作謗書以誣盛德蓋誅絕之罪也

陳氏曰題梅堯臣撰以廐馬爲書名其說曰世以旋毛爲醜此以旋毛爲貴雖貴矣病可去乎其不遜如此聖俞必不爾也所記載十餘條公卿多所毀訐雖范文正亦不免或云實魏泰所作托之聖俞王性之辨之甚詳而邵氏聞見後錄乃不然之

邵氏曰梅堯臣著碧雲駮應昭陵時天下大臣惟杜祁公衍富鄭公弼韓魏公琦歐陽公脩無貶外悉譏詆之無少

避范仲淹亦在詆中以仲淹微時常結中書吏人范儵因以破案仲淹既貴略不收卹王銍不服以爲魏泰僞說堯臣著此書銍跋范仲尹墓誌云近時襄陽魏泰者場屋不得志喜僞作他人著書如志惟集括異志倦游錄盡假名武人張師正又不能自抑出其姓名作東軒筆錄皆用私喜怒誣讖前人最後作此書且范仲淹與歐陽脩梅堯臣立朝同心詎有異論特堯臣子孫小輝故挾之借重以欺世今錄楊闢所作范仲尹墓誌庶幾知泰亂是非之實至此也則其他泰所厚誣者皆迎刃而解可盡信哉銍猶及識泰知其從來最詳張而明之使百世之下仲淹不蒙其謬焉類人王銍題博以爲不然亦書其下仲淹不蒙其謬焉使仲淹不蒙其謬堯臣亦不失爲君子矣然堯臣蚤接諸公名聲相上一獨窮老不振中不能無躁其聞范仲

淹計詩云一出匪更郡人皆望酒靈俗情難可學奏記向
來無曾賤常甘分崇高不解諛雖然門館隔泣與眾人俱
夫爲郡而以酒悅人樂奏記納諛豈所以論范仲淹堯
臣之意真有所不足耶如著彥博宦龍錦事則又與書竄
詩合矣故疑此書實出於堯臣

李氏曰碧雲駮一書凡慶曆以來公鉅卿無不譏詆世
傳此書以爲出於堯臣怨對之口其後諸公論議多矣
如葉夢得王銍則以爲非堯臣所爲而邵博乃疑其詩以
爲堯臣之意豈有所不足遂以此書爲實出於堯臣今以
魏泰東軒筆錄考之然後知泰之殊名於堯臣者不特此
書也筆錄載文彥博燈籠錦事大略如碧雲駮所云其載
堯臣作唐介書竄詩則句語狂肆非若堯臣平時所作簡
古純粹平淡深遠又曰堯臣作此書不敢示人及歐陽脩

爲編其集時有嫌避又削去此詩是以人少知者詳味此
言是泰旣以此詩嫁於堯臣又慮議者以爲脩所編無此
遂曰脩有嫌避而此不載皆無所考之詞也觀此則謂泰
以碧雲駮之書假名堯臣不妄矣况堯臣平日爲人仁厚
樂易未嘗忤於物歐陽脩嘗以此而銘其墓使堯臣怨懟
果爲此書以厚誣名臣則所養可知矣今市井輕浮之子
未必爲之而謂堯臣爲之哉

孔氏野史一卷

容齋洪氏隨筆曰世傳孔毅甫野史一卷凡四十事予得
其書於清江劉靖之所載趙清獻爲青城宰挈散樂妓以
歸爲邑尉追還大慟且怒又因與妻忿爭由此惑志文潞
公守太原辟司馬溫公爲通判夫人生日溫公獻小詞爲
都漕唐子方峻責歐陽永叔謝希深田元鈞尹師魯在河

南携官妓游龍門半月不返留守錢思公作簡招之亦不
荅范文正與京東人石曼卿劉潛之類相結以取名服中
上萬言書甚非言不文之義蘇子瞻被命作儲祥宮記大
貂陳衍幹當宮事得旨置酒與蘇高會蘇陰使人發御史
董敦逸卽有章疏遂墮計中又云子瞻四六表章不成文
字其他如潞公范忠宣呂汲公吳冲卿傅獻簡諸公皆不
免譏議予謂决非毅甫所作蓋魏泰碧雲駮之流耳温公
自用龐穎公辟不與潞公子方同時其謬妄不待攻也靖
之乃原甫曾孫佳士也而跋是書云孔氏兄弟曾大父行
也思其人欲聞其言久矣故錄而藏之汪聖錫亦書其後
但記上官彥衡一事豈弗深考云

後山談叢六卷

容齋洪氏隨筆曰後山陳無已著談叢高簡有筆力然所

載國朝事失於不考究多爽其實如云呂許公惡韓當范
三公欲廢之而不能乃建議使行邊及丁文簡因杜祁公
一語之戲而陷杜子美以撼祁公丁晉公以白金賂中使
尼張乖崖之進與張乖崖聞逐萊公而買田宅以自污攷
之諸公出處日月皆不合前四事所係不細乃誕漫如此
蓋前輩不藏國史好事者肆意飾說爲美聽疑若可信故
誤人紀述後山之書必傳於後世懼貽千載之惑予是以
辨之

清虛居士隨手雜錄一卷

陳氏曰王鞏定國撰待制素子張安道之壻

容齋廣錄十卷

晁氏曰皇朝政和中李獻民撰分九門記一時奇麗雜事
鄙陋無稽之言爲多

墨客揮犀十卷續十卷

陳氏曰不知名氏

搜神秘覽三卷

陳氏曰京兆章炳文叔虎撰

石渠錄十一卷

陳氏曰校書郎昭武王伯思長睿撰

石林燕語十卷

陳氏曰葉夢得少蘊撰宣和五年所作也

燕語考異十卷

陳氏曰成都宇文紹奕撰舊聞汪玉山嘗駁燕語之誤而未之見也

玉澗雜書十卷

陳氏曰葉夢得撰其中所記亦當在宣和時所作玉澗者

石林山居澗水名也

避暑錄話二卷

陳氏曰葉夢得紹興五年所作

巖下放言一卷

陳氏曰葉夢得撰休致後所作

臺省因話錄一卷

陳氏曰兵部尚書新昌石公弼國佐撰

栢臺雜著一卷

陳氏曰石公弼撰雜記典故等事公弼本名公輔改賜今名為御史攻蔡京甚力竟坐深文謫死然本傳言其議論反覆非純正者

思遠筆錄一卷

陳氏曰翰林學士九江王寓撰寓以靖康元年七月以禮

部尚書入翰苑雜記當時聞見凡二十七條寓父易簡以
布衣召爲說書遂顯用寓後拜左轄使虜辭行謫散官嶺
表父子俱南下沒於盜

秀水閒居錄三卷

陳氏曰丞相汝南朱勝非藏一揆寓居宜春時作秀水者
袁州水名也

紺珠集十三卷

晁氏曰皇朝朱勝非編百家小說成此書舊說張燕公有
紺珠見之則能記事不忘故以爲名

陳氏曰視曾慥類說爲略

類說五十卷

晁氏曰皇朝曾慥編其序云閒居銀峰因集百家之說纂
集成書可以資治體助名教供笑談廣見聞

陳氏曰所編傳記小說古今凡二百六十餘種

春渚紀聞十卷

陳氏曰浦城何遠撰自號韓青老農東坡所薦爲武學博
士曰去非者其父也

曲洧舊聞一卷

雜書一卷

骹骹說一卷

陳氏曰直秘閣新安朱弁少章撰弁於晦菴爲從父建炎
丁未使虜留十七年旣歸而卒骹骹說者以續晁無咎詞
話而晁書未見

南游記舊一卷

陳氏曰會紆公袞撰

聞見後錄二十卷

陳氏曰邵某撰

翰墨叢記五卷

陳氏曰樞密睢陽滕康子濟撰

鐵圍山叢談五卷

陳氏曰蔡條撰諱鬱林博白時所作

侍兒小名錄一卷續一卷

陳氏曰序題胡谿居士而不著名氏始洪炎玉父集為此書王銍性之温豫彥幾續補今又因三家而增益之且為分類其中多用古字或云董彥遠家子弟所為也

萍州可談二卷

陳氏曰吳興朱或無或撰中書舍人服行中文子宣和元年序萍州老圃其自號也在黃州蓋其僑寓之地事見齊安志而或作或字無或未詳孰是

硯岡筆志一卷

陳氏曰唐稷撰自號硯岡居士

三編十卷

陳氏曰方勺仁聲撰泊宅在烏程相傳張志和泊舟浮家泊宅之所勺買田卜築號泊宅翁本嚴瀨人

却掃編三卷

陳氏曰吏部侍郎睢陽徐度敦立撰

間燕常談三卷

陳氏曰董弁令升撰取士相與談仁義於間燕之義

唐語林八卷

陳氏曰長安王讜正甫撰以唐小說五十家做世說分門三十五又益十七為五十二門中興書目十一卷而闕記事以下十五門又云本亦止八卷而門目皆不闕

紀談錄十五卷

陳氏曰稱傳密居士不著名氏蓋晁公邁伯咎也

經籍

子

文獻通考卷三百十七

崇禎三年重刊

道山清話一卷

陳氏曰不知何人跋語稱大父國史在館閣久多識前輩著館秘錄曝書記與此而三兵火散失近得此書於曾仲存家未題朝奉大夫暉亦不著姓

復齋閑記四卷

陳氏曰承議郎歷陽龔相聖任撰待制原之孫頤正之父也

鄞川志五卷

陳氏曰中書舍人龍舒朱翌新仲撰寓居四明故曰鄞川

窗間記聞一卷
陳氏曰稱陳子兼撰未知何人雜論詩文經傳亦開述所聞事

枕中記一卷

陳氏曰不著名氏崇寧中人所載多國初事

賢異錄一卷

陳氏曰亦無名氏所記四事其一曰鬼傳者言王融家子弟所遇與世傳王子高事大同小異當是一事耳

姚氏殘語一卷

陳氏曰刻姚寬令威撰

稿簡贅筆二卷

陳氏曰承議郎章淵伯深撰始得此書於程文簡氏不知何人作文簡題其後以其中稱先丞相申公知其為章野子孫也余又以其書考之言先祖光祿元祐三年省試東坡知舉擢為第一則又知其為援之孫也後以問諸章始得其名字其人博學有文以場屋待士薄如防寇盜用蔭入仕遂不就舉居長興故序稱若溪草堂淵自號懲室子

序言錄為五卷今此惟分上下卷

能改齋漫錄十三卷

陳氏曰太常寺主簿臨川吳曾虎臣撰

揮麈錄三卷後錄十一卷第三錄三卷餘話一卷

陳氏曰朝請大夫汝陰王明清仲言撰明清銓之子曾紆公袞之外孫故家傳聞前言往行多所憶後錄跋稱六卷今多五卷

投轄錄一卷

陳氏曰王明清撰所記奇聞異事客所樂聽不待投轄而留也

吳船錄一卷

陳氏曰范成大至能撰自蜀帥東歸紀遊取門泊東吳萬里船之語

老學庵筆記十卷

陳氏曰陸游務觀撰生識前輩年登耄期所記見聞殊可觀也

夷堅志甲至癸二百卷支甲至支癸一百卷三甲至三癸一百卷四甲四乙二十卷大凡四百二十卷

陳氏曰翰林學士鄒陽洪邁景盧撰稗官小說昔人固有為之者矣游戲筆端資助談柄猶賢乎已可也未有卷帙如此其多者不亦謬用其心也哉且天壤間反常反物之事惟其罕也是以謂之怪奇其多至於不勝載則不得為異矣世傳徐鉉喜言惟賓客之不能自通與失意而見斥絕者皆詭言以求合今邁亦然晚歲急於成書妄人多取廣記中舊事改竄首尾別為名字以投之至有數卷者亦不復刪潤徑以入錄雖叙事猥釀屬辭鄙俚不恤也

聯車志五卷

陳氏曰知興國軍歷陽郭家次象撰取睽上六載鬼一車之語

經鋤堂雜志八卷

陳氏曰倪思正甫撰

續釋常談二卷

陳氏曰祕書丞龔頤正養正撰昔有釋常談一書不著名氏家藏亦闕此書今故以續稱凡常言俗語皆注其所出

北山記事十二卷

陳氏曰戶部侍郎濡須王澹少愚撰

瑣碎錄二十卷

後錄二十卷
陳氏曰溫革撰陳時增廣之後錄者書坊增益也

夷堅志類編三卷

陳氏曰四川總領陳樸口華取夷堅志中書文藥房類

一編

雲麓漫抄二十卷 續抄二卷

陳氏曰通判徽州趙彥衛景安撰續二卷乃中庸說及漢定安公補紀也彥衛紹熙間宰烏程有能召

儆告一卷

陳氏曰不著名氏專叙報應

鑑誠別錄三卷

陳氏曰廬陵歐陽邦基壽卿撰周益公洪景盧有序跋

樂善錄十卷

陳氏曰蜀人李昌齡伯崇撰以南中勸戒錄增廣之多因果報應之事

山齋愚見十書一卷

山齋愚見十書一卷

山齋愚見十書一卷

七

陳氏曰稱灌圃耐得翁不知何人
程史十五卷

陳氏曰岳珂撰程史者猶言柱記也
游宦紀聞十卷

陳氏曰鄱陽張士南光叔撰
鼠璞一卷

陳氏曰戴埴撰
夷堅別志二十四卷

王質景文撰自序略曰志怪之書甚夥至鄱陽夷堅志出
則盡超之矣平生所嘗略類洪公始讀左傳文記漢書稍
得其記事之法而無所施因志怪發之久之習熟調利滋
耽翫不能釋間自觀陰要不為無補於世而古今文章之
關鍵亦間有相通者不以是為無益而中書愈哀所見聞

益之事五百七十卷二十四今書之目也余心尚未艾書
當如之則將浸及於夷堅矣凡夷堅所有而存見者刪之
更生佛之類是也凡夷堅所有而未備者補之黃元道之
類是也其名仍為夷堅而別志之辨於鄱陽也得歲月者
紀歲月侍其所者紀其所得其人者記其人三者并書之
備矣闕一二亦書皆闕則弗書醜而不欲著姓名者婉見
之如夷堅二確夢之類是也醜而姓名不可不著者顯揭之
如夷堅人牛之類是也其稱某人云又某人得諸某人云
若已所見各識其所自來皆循夷堅之規彙易所書甲子
之一為期過是弗書耳目相接也所書鬼神之事為主非
是弗書名實相稱也於夷堅之規皆仍之其異也者筆力
矐乎其後六

宋鄱陽馬端臨 貴與著
明蘄陽馮天馭 應房 校刊

經籍考 子農家

漢藝文志曰農家者流蓋出於農稷之官播百穀勸耕桑以足衣食故八政一曰食二曰貨孔子曰所重民食此其所長也及鄙者為之以為無所事聖王欲使君臣並耕詩上下之序

宋三朝藝文志歲時者本於恭秩平秩之義殖物寶貨者譜錄者亦出助衣食之源故咸見於此

陳氏曰農家者流勤耕桑以足食 神農之言許行學之漢世野老之書不傳於後而唐志著錄雜以歲時月令及相牛馬諸書是猶薄有關於農者至於錢譜相具膺鶴之

屬於農何預焉今既多從其類而花果栽植之事猶以農圃一體附見於此其實則浮末之病農者也

漢志九家一百一十四部

隋志五部一十九卷

唐志十九家二十六部二百三十五卷

宋三朝志三十二部二百一十三卷

宋兩朝志十二部四十七卷

宋四朝志一十九部三十三卷

宋中興志六十四家六十九部一百四十八卷

齊民要術十卷

晁氏曰元魏賈思勰撰記民俗歲時治生種時之事凡九十二篇農家者不出於神農氏之學仲尼既稱禮義信足以化民焉用稼以訓樊須而告曾參以用天之道分地之

利為庶人之孝言非不同意者以躬稼非治國之術乃一身之任也然則士之倦游者詎可不知乎故今所取皆種藝之書也前世錄史部中有歲時子部中有農事兩類實不可分今合之農家又以錢譜實其間今以其不類移附類書

陳氏曰起自耕農終於醯醢資生之業靡不畢書其曰治生之道不仕則農蓋名言也

巽巖李氏序孫氏齊民要術音義解釋曰賈思勰著此書專主民事又旁摭異聞多可觀在農家最雋然出其類而近世學者忽焉第奇字錯見往往艱讀今運使秘丞孫公為之音義解釋略備其正名十物蓋與揚雄郭璞相上下不但借助於思勰也此書李淳風嘗演之淳風書遠亡韓鄂又撮思勰所記別著四時纂要五卷本朝天禧四年詔

並刻二書以賜勸農使者然其書與律令俱藏衆弗得習市人輒抄要術之淺近者摹印相師用才一二此有志於民者所當惜也今公幸以稽公餘力悉發其隱蓋併刻焉豈惟決疑糾繆有益學者抑使斯民日用知所本末更被天禧遺澤不亦可乎

四時纂要五卷

晁氏曰唐韓諤撰諤徧閱農書取廣雅爾雅定土產取月令家令叙時宜採况勝種樹之書按崔寔試穀之法兼刪韋氏目錄齊民要術編成

陳氏曰雖時令之書然皆爲蠶事也

山居要術一卷

陳氏曰稱于收撰館閣書目在王旻皆莫知何時人也

蠶書二卷

陳氏曰孫光憲撰光憲事迹見小說類

芥少游蠶書

見少游淮海集第六卷序略曰予閑居婦善蠶從婦論蠶作蠶書考之禹貢揚梁幽雍不貢繭物充筐織文徐筐玄織縞荆筐玄纁璣組豫筐織績青筐壓絲皆繭物也而桑土旣蠶獨言於充然則九州蠶事充爲最乎予游濟河之間見蠶者諫事時作一婦不蠶比屋晉之故知充人可爲蠶師今予所書有與吳中蠶家不同者皆得之充人也

未譜五卷

陳氏曰宣德郎溫陵會安止移忠撰東坡所爲賦秧馬歌也謂未譜文既溫雅事亦詳實惜其不譜農器故以此歌附之安止熙寧進士嘗爲彭澤令

農器譜三卷續二卷

陳氏曰未陽令曾之謹撰安止之姪孫也追述東坡作歌
之意為此編周益公為之序陸稼觀亦作詩題其後
周平園序曰紹聖初元蘇文忠公軾南遷過太和邑人宣
德郎致仕曾公安止獻所著禾譜文忠美其溫雅詳實為
作秧馬歌又惜不譜農器時曾公已喪明不暇為也後百
餘年其姪孫未陽令之謹始續成之凡耒耜耨車戽車
笠鉏刈條簣存曰斗斛釜甑倉庾廩類惟十附以雜記勒
成三卷皆考之經傳參入凡制無不備者是可補伯祖之
遺成蘇公之志矣其序牛犁蓋一編之館轄予嘗學稼因
次其說山海經曰后稷之孫叔均始作牛耕世以為起於
三代予謂不然牛若常在畎畝武王平定天下胡不歸之
三農而放之桃林之野乎故周禮祭牛之外以享賓駕車
犒師而已未及耕也不然牽以蹊田正使藉稻何足為異

乃設奪而罪之之喻耶在詩有云載芟載柞其耕澤澤十
編其耘徂隰徂畛又曰有略其耜俶載南畝以明竭作於
春皆人力也至於穫之積之如墮如櫛然後殺時犗壯有
採其角以為社稷之報若使之耕曾不如迎猶迎虎列於
蜡祭乎厥後王弼傳易以羣穡之資宋景文公祈闢之
曰古者牛惟服車書肇牽車牛易服牛乘馬漢趙過始教
牛耕蓋本賈思勰齊民要術予謂輔嗣固失矣賈氏及景
文亦未為得也按論語子謂仲弓曰犁牛之子騂且角雖
欲勿用山川其舍諸此聖人格言也蓋犁田之牛純雜牝
牡皆可祭牛則非純非牡不可故曰騂且角也注疏乃以
犁為雜色騂為赤純色角為周正近世諸儒並從此義今
觀周禮牧人時祀牲必用牲純色也外祭毀事用旣旣
雜色也是則純雜之辨也對人設其福衡魯頌夏而福衡

白牡辨剛是則言角之意也竊疑犁起於春秋之間故孔子有犁牛之言而弟子用耕亦字伯牛彼禮記呂氏月令季冬出土牛示農耕早晚賈誼新書劉向新序俱載鄒穆公曰百姓飽牛而耕暴背而耘大率在秦漢之際何待趙過過特教人耦犁共二牛費省而功倍爾易傳出於魏晉第見牛耕不復考其初而賈公彥考工正義遂謂起於後漢其失尤甚

農書三卷

陳氏曰稱西山隱居全真子陳秀撰未詳何人其書曰田日牛曰蠶洪慶善爲之後序

耕桑治生要備二卷

陳氏曰宣教郎通判橫州何先覺撰紹興癸酉序

耕織圖一卷

陳氏曰於潛令鄞樓壽壽玉撰攻魏參政之伯父也

竹譜一卷

晁氏曰戴凱之撰凱之字慶預武昌人哀輯竹事四字一讀有韻類賦頌李邯鄲云未詳何代人

筍譜二卷

晁氏曰皇朝僧惠崇撰

陳氏曰僧贊寧撰

續酒譜十卷

晁氏曰唐鄭遨雲與撰纂輯古今酒事以續王績之書

酒譜一卷

陳氏曰汶上竇莘子野撰其人即著唐書音訓者

北山酒經三卷

陳氏曰不知撰人

茶經三卷

晁氏曰唐太子文學陸羽鴻漸撰載產茶之地造作器具古今故事分十門

陳氏曰羽自號竟陵子又號桑苧翁

顧渚山記二卷

晁氏曰陸羽撰羽與皎然朱放輩論茶以顧渚為第一顧渚山在湖州吳王夫差顧望欲以為都故以名山

煎茶水記一卷

晁氏曰唐張又新撰其所嘗水凡二十種因第其味之優劣

陳氏曰唐涪州刺史張又新撰本刑部侍郎劉伯芻稱水之與茶宜者凡七等又新復言得李季卿所筆陸鴻漸水品凡二十歐公大明水記嘗辨之今亦載卷末余足跡所

至不廣於水品僅嘗三四若惠山泉甘美置之第二不亦特未知康王谷水何如爾其次吳松第四橋水亦不惡虎丘劍池殊未佳而在第四已不可曉至於雪水清甘絕佳而居其末尤不可曉也大抵水活而後宜茶活而不清潔猶不宜故浮泉石池漫流者為上為其活且潔也若夫天一生水丞為雲雨水之活且潔者何以過此余嘗用爭器承雨水試以烹煎不減雪水故知又新之說妄也

茶譜一卷

晁氏曰為蜀無文錫撰記茶故事其後附以唐人詩文

建安茶錄三卷

晁氏曰皇朝丁謂撰建州研膏茶起於南唐太平興國中始進御謂咸平中為閩漕監督州莫創造規模精至嚴謹錄其園焙之數圖繪器具及叙採製入貢法式盧仝譏陽

美貢茶有安知百萬億蒼生墜在顛崖受辛苦之句奈於
謂亦云

北苑拾遺一卷

晁氏曰皇朝劉昇撰北苑建安地名茶為天下最良慶曆
初在吳興採新聞附于丁謂茶錄之末其書言滌磨調品
之器甚備以補謂之遺也

補茶經一卷又一卷

晁氏曰皇朝周絳撰絳祥符初知建州以陸羽茶經不載
建安故補之又一本有陳龜注丁謂以為茶佳不假水之
助絳則載諸名水云

試茶錄二卷

晁氏曰皇朝蔡汝君撰撰襄是祐中脩注仁宗常面諭云
昨卿所進龍茶其精裏退而記其試之法成書二卷送

御世傳歐公聞君謨進小團茶驚曰君謨士人何故如此
東溪試茶錄一卷

晁氏曰皇朝朱子安集拾丁蔡之遺東溪亦建安地名其
序謂七閩至國朝草木之異則產臘茶荔子人物之秀則
產狀頭宰相皆前代所未有以時而顯可謂美矣然其草
木厚味難多食其人物多智難獨任亦地氣之異云

呂惠卿建安茶記一卷

晁氏曰皇朝呂惠卿撰

聖宋茶論一卷

晁氏曰右徽宗御製

茶雜文一卷

晁氏曰集古今詩文及茶者

北苑總錄十二卷

陳氏曰興化軍判官曾伉錄茶經諸書而益以詩歌二卷
茶山節對一卷

陳氏曰攝衢州長史蔡宗顏撰

宣和北苑貢茶錄一卷

陳氏曰建陽熊蕃叔茂撰其子克義益寫其形製而傳之
北苑別錄一卷

陳氏曰趙汝鵬撰

品茶要錄一卷

陳氏曰建安黃儒道父撰元祐中東坡嘗跋其後

荔枝譜一卷 荔枝故事一卷

晁氏曰皇朝蔡襄記建安荔枝味之品第凡三十餘種古今故事

陳氏曰君謨為此書且書而刻之與牡丹記並行閩無佳

石以板刊歲久地又溫皆蠹朽至今尤藏其家而字多不完可惜也

增城荔枝譜一卷

陳氏曰無名氏其言福唐人熙寧九年承乏增城多植荔枝蓋非嶠南之大山實類吾鄉之晚熟搜境內所出得百餘種其初亦得閩中佳種植之故為是譜

四時栽接花果圖一卷

陳氏曰無名氏

桐譜一卷

陳氏曰銅陵逸民陳翥撰皇祐元年序

何首烏傳一卷

陳氏曰初見唐李翱集今後人增廣之耳

海棠記一卷

陳氏曰吳人沈文撰

橘錄一卷

陳氏曰知温州延安韓彥直子溫撰世忠長子也

菊譜一卷

陳氏曰史正志志道撰孝宗朝為發運使者也

范村梅菊譜二卷

陳氏曰范成大至能撰有園在居第之側號范村

糖霜譜一卷

陳氏曰遂寧王灼晦叔撰言四方所產遂寧為冠灼自號

頽堂

蟹譜二卷

陳氏曰稱怪山傳肱子翼撰嘉祐四年序怪山者越之飛

來山也

蟹略四卷

陳氏曰高似孫續古撰

越中牡丹花二品

陳氏曰僧仲林撰其序言越之所好尚惟牡丹其絕麗者三十二種始乎郡齊豪家名族梵宇道宮池臺水榭植之無間來賞花者不問親疎謂之看花局澤國此月多有輕雲微雨謂之養花天里語曰彈琴種花陪酒陪歌未稱丙戌歲八月十五日移花日序內戌者當是雍熙三年也越在國初繁富如此殆不減洛中今民貧至骨種花之風遂絕何今昔之異耶其故有二一者鏡湖為田歲多不登二者和買白著數倍常賦勢不得不貧也

牡丹譜一卷

晁氏曰歐陽脩撰初調洛陽從事見其俗重牡丹因著花

經傳

子

文法通考卷三十一

崇禎五年刊

品凡三篇

陳氏曰蔡君謨書之盛行於世

冀王宮花品一卷

陳氏曰題景祐元年滄州觀察使記以五十種分為二等九品而潛溪緋平頭紫居正一品姚黃及居其下此不可曉也

吳中花品一卷

陳氏曰慶曆乙酉趙郡李英述皆出洛陽花品之外者以今日吳中論之雖曰植花未能如承平之盛也

花譜二卷

陳氏曰樂陽張响子堅撰以花有千葉多葉黃紅紫白之別類以為譜凡千葉五十八品多葉六十二品又以芍藥附末响與其弟岷子望同登進士第岷嘗從邵康節學

牡丹芍藥花品七卷

陳氏曰不著名世錄歐公及仲林等諸家牡丹譜孔常甫芍藥譜共為一篇

洛陽貴尚錄一卷

陳氏曰殿中丞新安丘濬道源撰專為牡丹作也其書援引該博而迂怪不經濬天聖五年進士通類知未來壽八十一及歛衣空人以為尸解新安志云尔

芍藥譜一卷

陳氏曰中書舍人清江劉放貢甫撰

芍藥圖序一卷

陳氏曰待制新淦孔武仲常甫撰

芍藥譜一卷

陳氏曰知江都縣王觀通叟撰三家皆述維揚所產花之


一	一	一	一	漢書門
〇	〇	〇	〇	
〇	六	八	五六	
冊	架	函	號	類

一	一	一	一	漢書門
〇	〇	〇	〇	
〇	六	八	五六	
冊	架	函	號	類

一	一	一	一	漢書門
〇	〇	〇	〇	
〇	六	八	五六	
冊	架	函	號	類

一	一	一	一	漢書門
〇	〇	〇	〇	
〇	六	八	五六	
冊	架	函	號	類

文獻通考卷之二百一十九終



盛

寬政戊午

